



e-bilten

OPĆINA TEŠANJ
www.opcina-tesanj.ba
e-mail: optesanj@bih.net.ba

Ponedjeljak 27.12.2010

Broj 46

KONSTITUISANJE VLASTI

1. Konstituisanje vlasti
2. Hoće li se sporazumi implementirati lokalno
3. Preuveličavanje ili osporavanje zločina
4. Reforma općinske administracije

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: fuad.sisic@opcina-tesanj.ba. Molimo vas da ovaj elektronski bilten prosljedite svim zainteresiranim u našoj općini. Ukoliko želite da objavite neke od vaših novosti, iskoristite elektronski bilten općinskog načelnika, koji je brz, efikasan i besplatan način komuniciranja sa javnošću. Sa zadovoljstvom očekujem vaše komentare, sugestije i primjedbe.

Molim da ne prinatate ovaj sadržaj. Za svaki nepotrebno odštampan papir mora se bez potrebe oboriti drvo koje raste!

Sporazumi grupacija stranaka

Uskoro će tri mjeseca od dana proteklih općih izbora, a nova vlast nije konstituisana. Ne može se prigovoriti transparentnosti procesa pregovaranja i velikom broju sastanaka u proteklom periodu, ali očekivanim efektima bi, bez sumnje, moglo. Gledajući unazad, ovo što imamo sada, može se kazati da smo imali, manje-više i na početku pregovaračkog procesa.

Kako je to već postala praksa, prvo je došlo do grupisanja srpskih nacionalnih i srpskih socijaldemokratskih stranaka, kako se same nazivaju u jedan blok u korist entiteta RS (i uglavnom, protiv BiH u svemu što se ne mora).

Nakon toga je uslijedilo grupisanje dva HDZ-a, s ciljem (kako sami kažu) očuvanja legitimiteta autentičnih hrvatskih predstavnika u institucijama vlasti.

Napokon, dolazi do treće grupacije (SDP, SDA, Radom za boljitak i HSP) koja nije ni nacionalna, ni građanska, ali jeste i nacionalna i građanska u mjeri u kojoj to bude trebalo. Ova grupacija nije ni protiv koga, ona bi htjela ojačati proevropski put BiH ali nije dovoljna ni da sastavi vlast u FBiH (Dom naroda ne može konstituisati bez HDZ-a), a kamoli u BiH. Sporo im ide i u kantonima gdje imaju nesumnjive skupštinske većine, a u općinama imaju vlast u kojima je jedna stranka iz grupacije opozicija jer je općinski načelnik došao na ovu poziciju kao kandidat druge stranke iz grupacije. Iako lideri ovih stranaka nastoje u javnosti kreirati sliku usaglašenog pristupa i zajedničkih ciljeva, očigledno je da ne postoje efikasni mehanizmi funkcionisanja ni unutar pojedinačno samih stranaka, pa ne mogu postojati ni unutar grupacije, a kamoli unutar institucionalnih organa koji su popunjeni demokratskim izbornim procesom.

I nadati se da će se proces okončati, više ili manje uspješno, da ćemo dobiti nove vlade na svim nivoima, ostaje pitanje harmonizacije propisa i izgradnje efikasnih mehanizama vršenja vlasti. Ako bi ipak politička volja bila na strani nade, bržeg oporavka bh društva, to samo po sebi neće biti dovoljno. Potrebna su znanja i vještine, kompetencije i posvećenost da se propisi sagledaju i pripreme izmjene, ili donesu potpuno novi propisi u nekim područjima.

I opet ostaje teži dio posla, izgraditi efikasne mehanizme vršenja vlasti, efikasno pružanje usluga građanima i poslovnom svijetu. To nije moguće bez elektronske uvezanosti, bez kompetencija i posvećenosti na operativnom nivou.



A to se opet ne može postići bez opredjeljenosti rukovodstva (ministara, premijera) ka tim promjenama. A to se opet ne može postići dok na pozicije premijera i ministara budu predlagani stranački zaslužni kadrovi bez potrebnih vještina, i bez podrške stranačkih lidera da se na tome istraje. A hoće li se to i kada dogoditi? Hoće, s Božijom pomoći, ne znam kada će.

HOĆE LI SE SPORAZUMI GRUPACIJA IMPLEMENTIRATI LOKALNO?

Može li se formirati vladajuća većina u OV Tešanj?

Rukovodstva grupacija bosanskih stranaka proevropskog puta BiH, kako sebe najčešće nazivaju SDP, SDA, Radom za boljitak i HSP, imaju previše posla oko toga da se vlast uopće formira na višim nivoima. Može li se očekivati u takvom ambijentu pomak na nivou lokalnih zajednica?

U prvoj godini mandata, imali smo vladajuću većinu predstavljenu javnosti u više navrata u strankama: SDP, SBiH i BPS SH (14 vijećnika od 25), koja početkom 2010. godine ili krajem 2009. godine nije više tako čvrsto funkcionisala. Nije bilo ni objašnjenja javnosti šta se dogodilo i zbog čega se dogodilo, više se moglo zaključivati iz pojedinačnih nastupa klubova u Općinskom vijeću i povremenih javnih saopćenja, i nezvaničnih razgovora. Druga godina je protekla bez bilo kakve zvanične većine, a Općinski načelnik je imao više saradnje u pojedinim intervalima sa klubovima SDA i BPS SH, nego sa klubovima SDP i SBiH. Izborna godina je sama po sebi učinila svoje. Šta dalje?

U Tešnju, SDA i SDP imaju zajedno 17 od 25 vijećnika, dvotrećinska većina dovoljna i za statutarne izmjene. Kandidat SDP je Predsjedavajući OV-a, a kandidat SDA je Općinski načelnik. Šta je još potrebno da ove dvije stranke preuzmu odgovornost za funkcionisanje lokalne vlasti? Općinski načelnik sa saradnicima za budžet je održao sastanke sa svim klubovima: SBiH, SDP, SDA i BPS SH. Postignut je visok stepen saglasnosti. Predloženi budžet za 2011. godinu ima podršku, ostaje da se vidi hoće li imati i punu podršku? Vjerujem da hoće, jer su temeljni zahtjevi klubova vijećnika uvaženi. Općinski načelnik će nastaviti aktivnosti u pravcu izgradnje saradnje sa svim klubovima vijećnika u Općinskom vijeću, bez obzira hoće li se, ko i kako na nivou političkih stranaka dogovoriti u pogledu većine u Općinskom vijeću.

Bilo bi korisno i politički odgovorno prema građanima, a olakšalo bi i funkcionisanje izvršne vlasti, ako bi političke stranke napravile takav sporazum. Ako do njega ne dođe početkom 2011. godine, dalje će biti sve teže, jer nakon 2011. godine dolaze lokalni izbori. Političke stranke će vjerovatno početi kalkulisati u pogledu računice spram izbornog rezultata, iako vjerujem da će građani prepoznati sve koji budu kalkulisali sa njihovim povjerenjem u toku mandata zarad novih mogućih mandata, ma ko to bio, i ma gdje to bilo.





PREUVELIČAVANJE ILI OSPORAVANJE ZLOČINA

Šta se dogodilo 1992-1995 u BiH?

Na državnoj televiziji Republike Srbije, 22. decembra 2010. godine, u večernjem terminu je gostovao Milorad Dodik, Predsjednik Republike Srpske, Predsjednik jednog od dva entiteta Bosne i Hercegovine. Milorad Dodik se trudio objasniti da iako je broj radnika i penzionera u RS-u isti, iako postoje socijalne tenzije i problemi u nekim fondovima, RS je i dalje jedina samoodrživa kategorija, a da to nisu ni FBiH, ni sama BiH.

Milorad Dodik nije mogao odoliti a da ne iskoristi priliku ovog javnog nastupa, iako ga voditelj to nije pitao, da kaže kako nije njegov problem što neki nisu u stanju slušati ono što on iznosi kao stajališta, i ono što on iznosi kao činjenice kojima on raspolaže. Pri tome je iznio da su sve žrtve rata u Bosni i Hercegovini tri puta manje od ranije objavljenih (nisu 300.000 nego 96.000 tvrdi Dodik (od toga 28.000 Srba), i još tvrdi kako to tvrdi Institut za nestale osobe koji je, tvrdi Dodik, bošnjački), te kako je broj silovanih bošnjačkinja nevjerovatno uvećan kao da su postojali postrojani bataljoni za silovanja i kojima su izdavane takve komande. Nemoralno, neukusno, politički prizemno, institucionalno neodgovorno, nacionalno samoodbranaški nepotrebno...

REFORMA OPĆINSKE ADMINISTRACIJE

Stvarne promjene se događaju

Općinska administracija je početkom 2009. godine postavila sebi nekoliko ciljeva na putu ka reformama:

■ Tehnološke promjene

- Promjene u alatima: digitalni umjesto pisani zapis, analiza umjesto statistika, poboljšanje procedura umjesto otklanjanja pojedinačnih propusta, procesni pristup umjesto organizacijskih ograda

■ Strukturalne promjene

- Organizaciju prilagoditi i kapacitirati novim zahtjevima
- Promjena organizacijske kulture, normi i vrijednosti

■ Promjene uposlenih

- Razvoj ljudskih resursa umjesto kadrovske statistike
- Promjene u vrijednostima, vještinama i stavovima svakog uposlenog

■ Promjene usluga

- Novi zahtjevi traže nove procedure i rješenja
- Decentralizirana uprava

Nepune dvije godine nakon toga, općinska administracija ima nove alate, drugačiji pristup, drugačije postupke, djelimično prilagođenu organizaciju, kreiraju se polahko nove vrijednosti i institucionalni imidž.



Općinska administracija je u stanju demonstrirati i dokazati svoje performanse, što već otvoreno priznaju mnoge međunarodne i domaće organizacije koje na bilo koji način prate rad općinskih uprava.



Naravno, time su tek izgrađene pretpostavke, ili su na dobrom putu da se to dogodi, za efekte koji trebaju prepoznati u konačnici građani. Ako se to ne dogodi, neće biti velike koristi. Da bi se to i dogodilo, nužno je uvezovanje sa drugim institucijama, javnim ustanovama i javnim preduzećima kako horizontalno lokalno tako i vertikalno prema različitim nivoima nadležnosti i odgovornosti.

Nužno je izgraditi kompatibilan, efektivan i efikasan sistem jedinstvenog funkcionisanja vlasti koji će moći brzo reagovati na probleme makar se radilo o potrebi izmjene propisa, ili efikasnije nadzorne i upravne akcije. To znači ne samo skraćivanje vremena usluga i smanjenje troškova, nego i sprečavanje samovolje građana u području nelegalnih aktivnosti: gradnja, eksploatacija šljunka, bacanje smeća, kanalizacioni odvodi, onečišćenje puteva,...

Općinska administracija je opredjeljena da nastavi ovim putem, da stalno eliminiše svoje nedostatke i uvodi poboljšanja, da predlaže i traži od drugih zajednički pristup, da ne odustane ma koliko dugo to trajalo. Općinska administracija je istovremeno otvorena za sve nove ideje i prijedloge koji će biti korisni, makar to značilo i promjenu iznesenog pristupa.

**Gradanima, katolicima i
pravoslavcima, općine
Tešanj:
SRETAN BOŽIĆ**

**Svim građanima općine
Tešanj:
SRETNA 2011**



**PRED ČATIĆEVIM
MEZAROM**

*Isti je nišan nad nama
samo je tvoj bolji svijet*

Amir Brka

Općinski načelnik
Fuad Šišić

